

乾隆杭州府志

杭州府志卷八十八

人物四 循吏三

明二

陳洪範字錫卿仁和人嘉靖辛丑與弟洪濛同舉進士授工部主事治呂梁呂梁之險最爲行旅患洪範鑿惡石二十二處濬其淺流舟乃得安行又蠲去商舟緡錢往來者稱便擢四川副使備兵威茂二州宣布威信振肅風紀羗人懾服卒年五十有六

仁和縣志

許鑰字北門錢塘人嘉靖辛丑進士知進賢縣務鋤強暴中忌者遂改松江教授至則屏置俗學以身教先之曰士

猶處女不女子閩而婦于室者無之又曰言佻而華本之
先撥雖有才末矣士皆佩服之歷漳贛二府佐終南京刑

部郎中

松江府志

沈梅字近溪錢塘人嘉靖癸卯舉人署銅陵教諭日下帷
率諸弟子讐六籍及百家言遷知貴池縣省供帳絕饋遺
平繇役決滯獄修庠序廉邑之豪強而軌法者稍艾薶之

以循良稱

池州府志

陸州字汝行海寧人嘉靖甲辰進士由刑部郎中出知常
德府會鼎建三殿木運孔棘運木使者乘勢爲奸利民間
騷然州爲調停差撥以陰折其非屬路賴以安堵先是榮

藩嘗請濱江地租而并稅艦筏之泊埠者久之中官愈益橫索州下令禁治之皆斂跡郡受沅靖五溪諸水州募民貲蠲帑金爲石堤澇至始不爲災治郡三年定稅籍均傳費獎士類禁遏糴不爲烜赫可異之政惟務約已愛民考滿擢九江兵備副使民生祀之于城北又三年內艱歸卒于家訃至常常民朝夕慟哭祠下

楚志

楊祐字汝承錢塘人嘉靖己丑進士選庶吉士出知興國州擢刑部員外郎左遷濮州知州陞濟南同知爲政廉平爽圍其典二州佐劇郡皆以平賦役興學校著名節財省費訊決無枉所在得吏民心陟江西僉事甫入境值弋陽

貴溪盜起祐單車詣部收其渠魁餘悉下教原之盜咸解
散復坐興國謗議調湖廣僉事擒劇盜廣招攜興利舉廢

卒于官

萬歷舊志

童蒙吉字子順臨安人嘉靖丙午舉人任如臯知縣田賦
稍輕當路希宰相旨欲增額蒙吉毅然不可事遂寢又嘗
出誣盜十餘輩遷潮陽通判攀轅者千餘人劾崇德樓祀
之致仕居鄉設睦族亭置義田以資貧士

萬歷臨安縣志

汪烜字春渠臨安人嘉靖丁未進士選人司劾嚴嵩貶
吉水縣丞尋陞高安知縣愛民如子出郭勸農父老爭以
酒獻烜作詩勞之陞漳州通判轉安慶同知遷刑部郎中

因忤嵩出知九江府礪志清廉歷有善政致仕歸有富豪
殺人以千金于之炷曰吾活殺人者是吾殺人也固却之

臨安
縣志

吳遵字公路海寧人嘉靖丁未進士知長樂縣興利除害
選才育能縣有廢寺二曰觀音巖泉寺田若干畝豪右攘
之遵悉取以充學校爲肄業費士德之像祀于射圃之寢
堂縣賦例輸三百石于萬安倉民艱遠餽遵請改輸福清
倉民便之馬江諸渡稅積逋千餘緡貧莫能償遵請蠲之
衆樹碑江滸以頌德邑有高允實者誣併戍籍遵廉得其
狀力爲解脫其家繪像以祀後拜監察御史遷太僕寺少

卿長集

縣志

高燦字德威臨安人嘉靖己酉順天舉人授通江知縣補

蒙城多異政

臨安縣志

陳師字思貞錢塘人嘉靖壬子舉人知永昌府嚴禁通夷

并治材官悍戾以靖軍民操守嶢然不滓

雲南通志

錢騰蛟字子雨仁和人嘉靖壬子舉人孝友出天性慮虧

色養乞爲學官兩攝縣篆有政聲擢知磁州復徙海州裁

供億減徭役不使病民捕蝗拯疫禱雨備致奇驗又發廩

賑餓者掩骼澤枯骨有巨猾作奸當事不敢問騰蛟摘發

其軌法數端論如律由是忤當軸左遷潞安別駕會西寇

告警中丞素知騰蛟才使厲兵治餉寇望風遁去上嘉其

績賜金綺以親老乞歸

舊浙江通志

董鯤字少溟海寧人嘉靖癸丑進士任宜興知縣性敏達遇事剖決如流不畏強禦民爲之頌曰如槩如冰董少溟以治行召拜侍御史歷按畿輔應天陝西諸郡風裁凜然在應天捕不法舉人彭應龍斃之人心稱快所建白刺舉並合大體時稱爲名御史

海寧縣志

徐炳字仲孚海寧人嘉靖癸丑進士授南京刑部主事進郎中歷遷河南副使備兵大名減供餉汰冗費裁省民兵濫額人德之屬邊戍缺伍部使者出清查勾諸郡邑令甚

峻炳曰勾軍補尺籍無益戎備祇破民家又發閭左護之行兼亦破里乃入言不便狀一道賴以全活轉山西布政

司叅政卒

萬歷舊志

祝世廉字子隅海寧人嘉靖癸丑進士授刑部郎慮囚江南諸郡平反甚多出知汝寧府伊藩肆虐民苦之長吏亦數被窘辱朝遣重臣往悉以屬世廉乃取渠惡寘重典餘決罰有差能聲甚著入覲感寒疾卒年四十四

翁大立撰墓誌

沈志言字慎齋海寧人嘉靖癸丑進士歷官刑曹郎時王璫方柄用匿巨豪某志言必致之理嚴世蕃下獄人持兩端卽訊者率莫敢任志言抗辭簿責之不少貸出知寧國

府問民疾苦蠲不急之歛于官者以官羨代充民之歲額者無算如輿外繇隄墮圩時蓄洩得田數千頃號曰沈公圩增築旌陽城備他盜也更葺北臺以增澤宮之勝號曰沈公臺履畝作程畫爲令甲富者難以巧營貧者役無重困號曰沈公里其爲政類如此尋掛冠歸

鍾化民志略

應明德字養虛海寧人嘉靖癸丑進士授刑部主事時楊繼盛劾嚴嵩十罪五奸有旨先下鎮撫司榜問究主者嗣發緹帥杖一百送刑部擬罪楊瀕死再蘇提牢皆奸黨也明德獨檢湯藥視飲食者十四日復說尚書出之老監遷于外庫或誅以重禍勿懾也

舊志

金俸錢塘人嘉靖乙卯舉人任汀州推官執法平反民稱
無冤署寧化篆時丈量多溢額民以爲憂俸定爲四則上

下均勻填還原額

福建通志

駱秉韶字宗虞臨安人嘉靖乙卯順天舉人授瑞昌知縣
遷高州通判攝博羅事多方殺水勢繕縣城暴民不敢竊
發起復補廣州調俸南雄橋稅務擢知簡州造橋以濟人
行州民立生祠祀之尋致仕歸

萬歷臨安縣志

周詩字汝學錢塘人嘉靖丙辰進士知南陵縣歲大水奏
請減逋負數千又請豁種馬牧害少息清覈奸民隱田一

千有奇田賦以均

南陵縣志

楊周字道甫仁和人嘉靖辛丑進士授工部主事督琉璃
廠奄人欲有所乾沒請于周周不許省費七萬有奇既報
命改督清江浦裁羨餘嚴嵩之黨禮科給事中藍璧過浦
大舟四載貨物亡算欲免稅周不許璧怒詈之周遂乞致
仕不待命掛冠歸

仁和縣志

柴喬字汝遷錢塘人嘉靖戊午舉人知靖江縣修廢舉墜
一切冗費贅役革除殆盡立法恤民疾苦甫一載以憂去

常州府志

謝教字文載於潛人嘉靖戊午舉人授懷遠知縣遷知忠
州時宣慰土司馬得知擅據疆土教以大義責之遂還土

地三十里歷撫州同知補吉安同知興利除弊所在有循
更名遷淮府長史受遺輔幼歷著勞績以年老致仕歸

浙江

通志

許三省字一所錢塘人嘉靖戊午舉人萬歷時擢山西道
御史巡鹽兩淮不取羨餘抵鳳陽吏白當往謁鎮守太監
廖某三省曰人臣未拜陵寢先謁內侍可乎廖知三省將
至質明灑掃具酒醴以迎三省卒不至左遷夔州守有惠
政時猛虎噬人三省齋戒檄之者三虎斃壇下民建伏虎
亭以表之後璫又誣以他事罷官幼時母乳癰三省將親
吮之醫曰母病愈顧兒中母乳毒矣三省不聽卒吮之母

旋愈俄而三省面腫絕食者累日尋亦無恙

錢塘縣志

查志隆字鳴治海寧人嘉靖己未進士授寧國推官刑清訟簡聲望蔚然歷南駕部郎中出守皖城調保定旋晉天津兵備地多巨盜治事月餘雖夜行亦安堵值路藩就封

道經天津處置有方軍民不擾創建小學教民興行又葺

城隍復團兵功最著轉山東糧儲道卒

浙江通志

翁大賓字萬頤餘杭人嘉靖辛酉舉人授漢州學正擢知臨水縣調仁化憂歸起補梓潼大賓歷三縣持己廉潔敷政循良以故久而民益愛思之

餘杭縣志

林梓字汝林仁和人嘉靖壬戌進士隆慶間知延平府剛

介鎮靜詞訟立剖不事交接以嚴御屬後擢雲南副使卽

抗疏歸

福建通志

周浩字養正號義所錢塘人嘉靖壬戌進士隆慶間知衡州性狷介馭下嚴整人以故憚之至其冰雪之操五年如一日也聲譽矚然湖以南無與爲比因分憲公檄取所問理贖緩頻數浩如檄與之而留其檄以此相猜嫌遂遷閩中都轉運使

衡州府志

浩爲運使商人向有常例錢歲計千餘

緡浩却之不受曰爾無逋課足矣一時稱其廉擢廣西按

察使卒于官

福建通志

陳希文錢塘人嘉靖壬戌進士知甌寧縣温粹謹飭而執

法如山常曰耗頭革則稅歛易完詞訟簡則刑罰自清吾

與民休息耳一時稱安靜吏

建寧府志

王體升錢塘人嘉靖辛酉舉人知高淳縣性抗執涖下嚴整不畏強禦時天界寺僧冒欽賞田匿稅多方援請以求

必得乃嚴申常道力持之議竟寢人服其明斷

高淳縣志

范善字兼之餘杭人嘉靖甲子舉人授鳳陽令邑地苦衝多逋賦善廿七年住俸曰催科易耳忍秦越人視吾民捐瘠哉以故格徵召會御史李公棟賢之爲奏免舊逋又捐支費銀七百兩抵額始得遷去邑民泣送數百里不絕歷官北京刑部郎中多所平反擢知青州青故饒沃以倭証

苦徵發善餽運兵餉無缺而礦稅又起璫使橫甚激民變
善單騎馳諭借臨胸庫銀給發諱乃定璫感且愧緝羣下
曰范使君賢者毋犯焉累遷陝西苑馬寺卿兼僉事致政

歸

餘杭
縣志

按省志選舉卷中范善榜名檉餘姚人而餘杭志載善
事如右茲從縣志錄入

潘頤龍字雨田錢塘人嘉靖乙丑進士柄國者欲招致門
下投庶常不用選知泰州有異政擢刑部郎恤刑湖廣多
所平反陞揚州守丁內艱廬墓足跡不入公府補福州兩
郡泉貨輻輳纖塵不染時目爲清官第一備兵潁上潁多

盜河數決願龍設方畧藏諸寇鳩工疏濬河以永寧有塗
山令誣諸生爲盜置大辟願龍按實黜令雪生寃鳳陽推
官馬某迎巡按意侵良善願龍大怒召推官切責之氣盛
痰壅卒于公座士民悲號罷市爭醵金殮之塑像以祀子
懋功萬歷丙午舉人澧州知州精吏治有循良稱陞南雄

丞却土官餽轄稅務羨金無所取

錢塘縣志

高汝梅字子和嘉靖辛酉舉人令繁昌地濱江歲苦潦汝
梅創築高塍植樹障隄又濬陂池備山田蓄洩民永賴焉
會丈田役興乃酌頒弓式令民履畝自報而單騎覆覈之
臺監檄遠近爲式課最遷福寧州守時悍卒以尅餉將變

汝梅躬慰諭皆帖服以親老告歸

仁和縣志

錢立字守禮仁和人嘉靖乙丑進士授刑部主事調兵部改工部汰冗剔蠹以幹練聞歷員外郎中出知太平府時蕪湖盜剽關稅守令執賈人誣服立閱牘歎曰是非盜有司乃真盜矣悉解縱之授捕者方畧不挾旬盜盡獲擢廣西副使備兵永寧適土夷爭田治兵相攻諸武吏請勦立不聽檄諭以禍福皆羅拜受命因法其一二首難者餘置不問所全活無算尋致仕歸

兩浙名賢錄

錢養廉字國維立之子萬曆己丑進士授工部都水司主事管河夏鎮時汶泗諸水以夏鎮爲壑而昭陽諸湖在其

下流養廉乃先從堤旁開二支河以殺水勢會以父喪去
官服闋召補吏部考功署郎中事日本犯界尚書石星主
和議總督孫鑛不從星乃誣鑛通書幣下廷議養廉屬草
剖析極明和議止鑛亦無罪

舊志

錢養度號如卓立之子萬曆丙午應天舉人授永豐令豐
故瘠土人捍俗薄胥吏爲窟穴尤好指斥帷簿民俗輕生
過織芥卽投纆仰藥家立破養度廉得其弊不務擊斷民

咸化之

江西通志

錢喜起字武山養度子崇正庚辰進士授南京工部屯田
司主事以過笞一武生生故驕且有所恃鼓衆登其堂喜

起盛服出曰此朝廷所命也吾非有私怨辱生君等奈何
以身試法衆遂散出守南昌南昌故多楚宗宗強多不法
吏莫敢問童子試時輒雜民籍中衣巾而入訶之曰楚宗
喜起牒下曰先一日試楚宗餘日試民籍至試期楚宗無
一人入者明日試民籍亦寂然于是搖手相戒曰太守疆

直母犯之南昌大治

錢塘縣志

褚相字元泉海寧人嘉靖癸卯舉人知霍州申除徐溝蒲
縣等處助差銀審定輪編夫役歲省郡貲數百創建正學
書院集庠彥肄業其中朔望親詣講學寒暑無輟士民立

祠祀之

霍州志

陳堯道仁和人嘉靖間以貢生授大埔教諭端範作人前
科甲久曠至是並二舉一時文教大振時嶺東盜起埔民
有聚衆謀攻縣治者堯道令兩生往諭禍福卽解散縣境
無井濱江汲水堯道于文廟前甃義井人德之稱陳公井
居六年致仕歸

仁和縣志

陳中復海寧人嘉靖間以貢生知霍山縣政崇簡朴民多
實惠聞河南盜起卽請之當道改築磚城城完尋水圯復
捐金甃石堤障之三年常祿外不取民一蔬以忤上官意

左遷去

廬州府志

翁之濟字汝達餘杭人嘉靖間以貢生授吉安府經歷會

有方田之役當事以溢額爲功之濟奉檄視廬陵乃行烈日中履畝數數悉得隱占狀不爲當事所奪民頗賴之竟

以是左遷拂衣歸

吉安府志

吳鰲餘杭人嘉靖間以貢生授泉州府照磨有幹辦才偶廳事火人居其中不得出隸卒觀者愕不敢前鰲奮身救

焉全活數十人生平以介自持至今稱廉吏云

泉州府志

查志文字鳴周海寧人隆慶丁卯舉人授廬州通判絕苞苴却稅羨嘗割俸代輸贖銀時河工告急當事檄治懷仁睢寧等處志文輒負畚鍤以身先之會雪甚役者墮指志文請便宜當事者利亟成不許乃私自散遺約以解凍而

集工咸如期至感思奮勵不督而成遷無爲州守叙河功
加廬州府同知仍管州事州治濱江患水卽發粟以賑全
活數萬又值大祲郡守督稅急牒三四下復遣吏督促志
文乃解印綬更阜帽請以身坐吏還報郡守乃止尋爲忌
者所中遂解任歸

兩浙名
賢錄

周啟祥字源伯海寧人隆慶戊辰進士由刑部郎出知廣
州性廉介明習法令門以內澹如傳舍茹蔬服陋每出簡
輿從所至人不知其太守也會制府命討布涌諸將掠羶
民徼功繫累相屬啟祥多讞出之其不能自存者發居民
收恤毋令獄死以俟必白所活以百餘計後以覲行道卒

于金牛驛囊中僅數金而已粵中哀而祀之

廣東通志

楊萬春字汝和錢塘人隆慶丁卯舉人嘗兩割股奉親萬

歷間知上杭縣縣有疑獄二前令莫決者三年萬春齋禱

城隍神遂得本情上杭人稱神君

汀州府志

上杭有民人曾元

曾安兄弟賈于外元以十三金令弟安還家安與一人及

一老者行其人竊見安與老者有貲乃與安謀曰此翁單

行有重貲吾與汝可圖也安諾行至曠野其人令安持挺

踣老者自以刃從後斫安殺之盡得兩人貲後兄歸始知

安久不歸訟之縣窮治同行了不可得萬春至乃詣城隍

神屏羣從獨與元居祠中至夜鬼啾啾作聲元大怖呼曰

弟安至矣鬼低聲泣不能言萬春曰成案有名者若干人
吾一一唱名至殺汝者則速應聲連唱至一人鬼忽號叫
萬春歸而執其人一考而服曰我謀曾安良是何知老翁
須再詣城隍老鬼至而執我我無辭矣萬春又與偕詣城
隍夜二鼓其人急呼曰老鬼今在殺老翁者亦我也萬春
曰汝何以一謀殺兩人曰我見曾安與此翁俱有貲給安
殺翁我併殺安耳

鴻苞
紀事

翁金堂錢塘人隆慶戊辰進士知鎮平縣毀淫祠爲書院
事有病民無不釐剔與強藩爭反復陽之田邑人賴之徙
銅陵有善政長于歌詩留題甚多遷廉州府同知去

池州
府志

黃應奎號翼菴錢塘人隆慶丁卯舉人萬歷間知汀州府
清裁不避權勢郡有長橋逕劫盜出沒應奎每季調千百
戶一員提軍六十名防禦盜爲斂跡後掛冠歸

汀州府志

祝世喬字子遷海寧人隆慶戊辰進士知莆田縣邑罹倭
難閭里譁然世喬極意撫循兵民乃戢擢刑部主事歷郎
中都城有大猾齟齬人短長號十八黨以多豪援事發莫
竟世喬悉以狀聞諸豪駢死道路一時稱快蘇松守臣請
逋賦數多者如逋邊糧罪著爲令有在令前者追償十九
猶執前議擬大辟會朝審世喬執不可忤柄臣意出守潯

州尋左遷歸

海寧縣志

祝以岡世喬子萬歷乙酉舉人授南安推官遷南陽同知
屢攝江右諸邑篆及南陽郡篆所至不務纖悉教養之政
次第舉行宛人稔饑以岡多方賑濟所全活甚衆終河東

運同

金學曾撰
墓誌銘

徐桐字茂陽餘杭人隆慶丁卯舉人授婺源縣博士擢瑞
昌令邑故瀕江民甚慄悍椎埋劇攻桴鼓晝起橫行江黃
間桐甫至設方畧捕得其魁民大懾服江水嚙田復築堤
以禦其患方田之政行郡縣騷然桐獨履畝勾稽諸詭匿
者盡出又爲減閭左徭賦民咸賴之郡守意在勸輸而以
實南城爲之名桐不忍浚民捐俸出餘餼成之以此失郡

指遷江州通判尋掛冠歸

餘杭縣志

黃思道號默菴錢塘人隆慶庚午舉人除知代州甫下車卽當編審諸冊手自裁覈減大戶止以十六名收解常課外有門稅悉爲裁革三晉礦徒嘯聚百姓震恐柄臣議撫思道獨持不可督撫如其策魁渠果自縛崇學校寬刑罰吏治爲全省最晝夜勤勞構暴疾而卒俸餘數金殮猶不

給柩歸州人悲號送之

舊浙江通志

諸夢環字宇懷仁和人隆慶辛未進士出守通州卹刑薄歛有古循吏風卒之日囊無一錢兄夢璋千里奔喪州民

醵資以賻始得還崇祀名宦

通州志

郭子直字舜舉海寧人隆慶辛未進士授禮部主事以裁
冗費忤中貴謫懷仁尉累遷廣東督學僉事攝篆南韶虔
寇王子龍餘黨嘯聚力主招撫全活萬計再遷福建副使
同安奸民妄稱日本移文將入寇民清洵洵子直畫戰守
示鎮定民藉以安未幾以病乞罷卒年七十九

寧志
備考

李大吉仁和人隆慶辛未進士知新喻縣先是邑多逋賦
大吉廉知里魁市猾代攝之弊悉按治之設法勸輸積逋
以完御下嚴而不苛勤而不怨一時稱其得體擢禮科給

事中

江西
通志

董成龍字希翔海寧人萬歷癸酉舉人授什邡令考最遷

太原同知擢柳州知府教養兼行柳人以比柳柳州崇祀

名宦祠

海寧縣志

林之盛錢塘人萬歷丙子舉人知慶雲縣學優才富剖決如流體恤民隱作養士類立社學按日爲諸生剖晰經義

督課之

河間府志

陳堯言餘杭人萬歷丙子舉人授武義教諭補秀水訓導課士不愧師儒擢萬年令有治才條議兌運民免賠累之苦築白馬湖堤以資灌溉行旅稱便禁盜緝奸四境安堵

修飭學宮文教聿興擢壽州守尋改解州卒于官

餘杭縣志

高守謙臨安人萬歷二年通判惠州時渠寇初平餘黨復

熾守謙行縣募鄉兵自隨屢誡賊首臺使稱其能委攝示
安彖招徠流民度地居之披草墾土常廢寢食見白骨纍
纍爲拾而掩之甫五月以勞瘁卒于官

廣東通志

查允元字虞臯海寧人萬歷癸未進士歷禮部郎中出爲
江西提學僉事再任江西叅政持守廉介蒞事六載始終
不移遜國忠臣練子寧八世孫練綺自福建長樂回原籍
允元訪得之給衣巾復給學租百石令奉祀金川書院年
未五十以疾乞休

江西通志

梁銓字叔衡仁和人萬歷癸未進士授宜興縣持身以廉
愛民如子在任三年瑞麥兩見以艱去

常州府志

銓令金壇邑

中經費出納多淆雜虧缺銓取他所奇贏補其最急可緩者俟之弗以煩民每歲漕羨悉除著爲令濬城西濠令深

廣城守有備

金壇縣志

莫睿字思卿錢塘人萬歷癸未進士由刑部郎分廵建寧道恬澹守正吏民畏服有奸猾包攬軍糧致軍丁鼓噪睿立擒倡首者置之法屬境肅然又有謬托神降言禍福者

民爲之惑睿立逮治事始寢

福建通志

高江字襟之應冕子萬歷乙酉舉人選諸暨教諭擢尹江西新城邑俗澆漓巨猾善持短長江以法繩其魁采風謠察疾苦條上十四事臺司著爲令杜請謁賂遺及贖緩奇

羨嘗覽訊牒有文某搥殺王女事一夕夢女跽訴詞惟駟
斐二字江乃悟殺人者馬四非文也庭質果欵服有婦誣
人殺其夫坐辟久江閱爰書曰實婦殺之也脇骨已折安
能行五里許而歸婦具服有理刑欲中傷之卽日移疾歸
改教東光攝吳橋令篆大璫盧受延之賞雪出貂裘衣之
拂袖起會疾卒縣令朱某入視含殮見一裘一葛竹床緣

帷篋中止俸數金歎曰真清白吏也

浙江
通志

施于國字用賓餘杭人萬歷乙酉順天舉人司教睢寧却
貧生贖更捐俸以助其膏火宰定南時權貴檄市名馬實
索餽遺于國直市馬以進權貴銜之左遷建寧學博擢臨

洮別駕職軍餉先是郡守以事用餉八百金隱之會以觀
行于國接署不甚核之逮于國遷藩府長史吏胥始白其
狀于國曰不可以辱守寧當其咎卒解橐裝不足至銷帶
鬻衣臨行不能具屣屣直指李思孝廉其節資乘傳焉以
母老謝官歸

餘杭縣志

朱履儀海寧人萬歷乙酉舉人任邵武府推官清弊鋤奸
摘發如神嘗捐俸建尊經閣日進諸生討論去之日民立

祠以祀

邵武府志

高從禮字質甫仁和人萬歷丙戌進士授刑部主事四方
奏獄全活數百人出守臨江郡大治所在立祠無何授按

察使時中使四出其豎役窘辱士人至激訟官不敢問從
禮置之法網紀肅然性廉潔有敷詩集納珠以獻者從禮
檢集得珠急馳返之叅藩時庫有贏餘萬金吏以白從禮
戒令封貯備意外事

仁和縣志

張鳴鶚號雲臺錢塘人萬歷己丑進士授工部虞衡司主
事督京厥省土瓦費巨萬舊時民運入都未飽奸吏卽終
歲露積所耗損無筭鳴鶚爲剏舍收貯以候稽納至今便
之釐治衢道訪古渠利用繩其侵塞者權貴歛手出守吉
安廉得大猾主名稍寘諸理訟庭閒肅掾屬凜凜終鳴鶚
任無敢以一牘嘗者尤好振作士類講學白鷺洲手甲乙

其藝礦稅事起貂虎四出肉視郡縣哮狼張甚鳴鸚置酒
與約以單詞定額他有所請輒合樂亂之中人爲之降禮
民賴焉擢河南按察副使辨郭英兄弟寃立捕得殺人者

一時稱爲神君晉叅閩藩尋罷官歸

董其昌
撰墓誌

王蒙亨字仲明餘杭人萬歷戊子順天舉人知懷寧縣銳
意興除合邑賴之性峭直不能媚上官遂致政歸

懷寧
縣志

祝以庭字心齋海寧人萬歷己丑進士歷刑部郎中任祁
門知縣入境苦久旱步禱輒應羣異之詔父老日勿異也
旱澇更事爾宜修古陽流法相地高下以時澹洩歲乃有
秋良禾洞賊竊出攻剽自祁及江右當事首鼠兩端以庭

毅然主勳潛布方畧雍之無遺突

舊海寧縣志

秦懋義仁和人萬歷己丑進士知海康縣性寬而敏甫下車值饑潮決堤躬行巡視請發官銀三千餘兩修完之又

建文昌閣于學中以培風氣士民歌頌擢貴州道御史

廣東

志通

秦懋觀號彬菴懋義弟萬歷甲午舉人歷遷臨安知府滇俗太守至首屬例以千金餽土司普名聲以例進懋觀却不受巡撫王伉與布政周士昌皆蜀人知名聲饒于資謂名聲謀不軌懋觀心知其誣爲力辨伉徵兵七千俾士昌統之伉亦走臨安視師名聲潛乞師交趾夜襲營擒士昌

以歸梟其首令叢射之伉怖甚乘間宵遁懋觀簡視戰守
責以大義賊向城羅拜起叱若曹何不退吾膝惟爲秦公

屈耳解圍去進本省右參政致仕歸卒

舊浙江通志

吳大山字仁仲錢塘人萬歷辛卯舉人由部郎歷任滇南
叅政滇有富商爲盜所誣家破而冤不雪大山至一讞而
出之人以爲神州牧有以寶玉精鏤求注上考者大山曰
暮夜之金可畏也其人慙而去天啟時魏忠賢竊政滇南
爲立生祠求大山記大山毅然不可遂告歸

錢塘縣志

高金魏字禎之號兆熙臨安人萬歷甲午舉人初授長興
教諭捐俸鼎新文廟縣人勒碑頌之擢鄒平知縣邑素疲

難爲濟南最金旣道以禮義釐清積弊風俗還淳巡撫趙
彥雅重之許以薦剡遽告歸益礪廉隅卒年七十九從祀

名宦

臨安
縣志

江源遠字澗甫錢塘人萬歷甲午舉人知武岡州時岷王
老有廢疾法令不行宗人怙勢驕蹇源遠裁之以法居官
廉謹常祿外不苟取一介初蒞官牒訴盈案久乃門可羅

雀移疾歸

錢塘
縣志

唐源錢塘人萬歷甲午舉人知善化縣加意愛民條陳四
議開南湖港泊舟通商禁夫馬私幫歲潦且疫請蠲請賑
煮糶施藥民賴生活者萬計卒于官貧不能殮官民捐資

以助喪

湖廣通志

錢兆元字長人仁和人萬歷甲午順天舉人知蘄州事深明理學行事多法古人聽斷無枉每日焚香告天方坐廳事暇則進諸生講習文藝無遠近爭師事之時三王之國供用浩煩民多驚懼兆元以身任之卒得無擾

湖廣通志

錢士鰲號石菴錢塘人萬歷丙戌進士知福寧州閱材碩望吏治精明待理者晨往夕歸無煩宿春糧也闌閩山陬夫征無擾胥徒之役僅供使令勾攝罔與端重鎮靜狡黠者望風投鼠終公任不敢錯一趾甫二載卒于官百姓哀

之立祠以祀

福寧州志

徐紹曾字衷耿海寧人萬歷乙未進士知黃岡令有盜魁
夜殺人按之急遂調愬上官幾爲移聽紹曾日以按盜獲
罪吾無愆矣他何恤薦紳士民以身代雪當事者隨亦廉
得其故由是能聲愈起會倭寇猖獗交倣徵發持戟之士
相望又推使道出楚郡邑橫被荼毒紹曾多方調劑民賴

之

湖廣
通志

柴紹勳字鴻生仁和人萬歷癸丑進士授嘉定知縣地濱
海號罷劇難治賦不易登紹勳至赫然更始會大浸害稼
爲力請臺使者蠲漕粟十五萬所全活飢民無算邑人德
之累遷北兵部武選司郎中時多徵發視中樞爲進退紹

勲有才畧咸倚重之擢廣東僉事未赴改備兵淮揚揚介
江海爲巨寇淵藪紹勲下車設法捕治又歲屢胥而河決
部內多被災紹勲請賑不獲猶爲勸糴蠲助日施糜粥湯
藥所在賴以少蘇尋進湖廣叅議以勞瘁得疾乞休歸

朱首

軒文

鈔

楊廷槐字祖植錢塘人萬歷乙未進士任浮梁令邑景德
鎮歲辦貢磁外供應諸司廷槐一無所賦曰吾去日必不
攜一磁以傷吾民也擢刑部郎會楚獄妖書相繼廷槐于
中調護甚力晉憲副備兵閩海忌者假大計中之左遷陞
判移南比部歷禮部出備兵徐淮議開駱馬湖以通漕運

徙徐州城以避河患改州爲府以便控制併徐淮道以一
統體清沛縣妖黨以安反側尋調天津近魏忠賢鄉里先
是監司有匍伏庭下者槐曰吾自用吾法僅投一刺忠賢
大不懌令其私人李明道出監漕勢張甚廷槐治其下隸
遂以凍糧不前削廷槐籍忠賢敗復官再備兵徐淮築歸
仁堤停課稅行捐賑葺浮橋立軍營復河道善政不一而
足者復中之竟拂衣歸尋調江西叅政再除湖廣按察使
俱不起

舊浙江
通志

翁汝遇字子先仁和人萬歷戊戌進士授東莞令權蕪湖
關最後守朝歌俱有惠政所在尸祝弟汝進字獻甫萬歷

乙未進士授興化令疏河四百餘丈東入海建四門石關

以爲水防歷官至山東叅議以忤逆璫罷歸

浙江通志

王國柱錢塘人萬歷丁酉舉人除廬州府推官治獄以敏

慎聞遷兗州府同知治河稱最以資格論人數爲撫按所

薦輒報罷遂拂衣歸子道焜以死節著名

吳農祥撰
王道焜傳

林杞號彝白仁和人萬歷丁酉舉人守楨州多惠政擢武

昌府同知權商稅不取一錢吏民頌其廉恕郡僚公讌黃

鶴樓忽巨盜數十至手刃推官孫公太守匿屏後盜目杞

曰公居官清介素號長者不相害也卽日棄官歸

仁和縣志

王國楨字君翼錢塘人萬歷丁未進士歷守中都惠州臨

江三郡明習吏治所至以鋤豪強見稱數與大吏爭是非
意所不可咳唾直侵其面天啟甲子卒臨江人哀之如私
親有從子曰克家字元建崇禎庚辰以明經賜進士爲涑
水令有仁政亦卒于官

錢塘縣志

許令典字維則海寧人萬歷丁未進士授上饒令調繁無
錫吳俗好以人命誣許令典至躬挾告者至尸所驗視面
質不實辭窮而退有他故則諭之使別具詞命役監葬而
後聽理往往被訐之人驚聞走縣門刺探虛實而事已竟
矣又窮治淫巫四境掃跡自城隍廟以下皆封禁終許任

無敢窺者

常州府志

黃克謙字含光仁和人萬歷戊戌進士爲工部主事權稅
荊州內監陳奉亦督稅于荆橫甚請便設東關稅克謙上
疏爭之事得寢沙市有通濟橋檣帆高者不得入遇風濤
常觸石碎舟商旅苦之克謙捐千金易橋爲高粱人稱便
焉號爲黃公津使竣還朝調兵部歷郎中有縉紳爲武吏
求遷克謙正詞拒之言者赧然退歷遷廣東右叅政分守
嶺南廣州俗富而悍貧者椎埋攻剽爲奸所屬十六州縣
以盜聞者口數百抱贖而進皆重辟也克謙力爲疏剔無
流滯者行之既久人不敢犯盜亦息數年以疾歸克謙性
至孝以不及視父飯舍每言及泣數行下事母盡色養友

愛諸兄恥言人過子孫相傳爲法以子機貴贈吏部尚書

仁和
縣志

錢士鼇字季梁仁和人弱冠舉于鄉文譽大振成進士授
六安州知州旱災跣禱于神甘雨隨至在任五載釋冤獄
鋤豪強尊者碩興學校政教斐然徙刑部員外郎未到官
調福寧州知州尤痛懲舞文吏卒于福寧年纔五十士鼇
性孝友少受業于仲兄夢鼇夢鼇舉鄉科仕通許知州士
鼇寡仲約束惟謹不命之坐不敢坐至成立猶然素恬淡
屢空晏如不問家人生業山水之間得趣卽往發爲詩文
自抒胸臆生平最嗜司馬太史蘇端明之文著述甚富

仁和

縣志

高金體號兩目臨安人萬歷辛丑進士授安溪令調侯官
除金蠶壘斷腸草杜數百年流禍累遷彰德知府禱雨人
呼太守雨驅蝗人呼驅蝗太守至處趙藩焰瑤案山屹不
可搖因母老乞假歸

臨安縣志

王錫袞字仲山昌化人萬歷丙午舉人授桐廬教諭修學
宮勤訓迪士類聿興擢宰霍山絲事忤學使者意左調上
林署丞再出爲福建鹽運司知事有廉幹聲委知建寧古
田二縣清盜主悉發伏黨數十人邑境寧靜民賴其功

昌化

縣志

吳之鯨字伯霖仁和人萬歷己酉舉人知上饒縣有善政
嘗語人曰吾藻鑑甚精三尺難犯蓋實錄也月課士分俸
贍貧一時學者宗之未幾卒于官

江西通志

張懋謙字君平仁和人萬歷壬子舉人歷官九江知府九
江權關臨大江商人輸稅往往遭風濤劫掠之害懋謙就
老鶴塘濬河建閘可泊百餘舟令避險阻增修七門城樓
儲軍器勸民積穀以備荒初至戢大盜剪凶頑以息訟爲
百姓勸鄰郡飛蝗殺稼獨入九江者盡死旱潦有禱輒應
進貴州按察副使備兵貴寧四年棄官歸卒于家九江至

今有張公祠

江西通志

彭期生海寧人萬歷丙辰進士歷任藩臬崇禎中謫應天推官初之官不携家室屬邑例供薪米却不受題詩于壁云家鄉有菽水移向任所來誰能不飲食竊恐是民財其清介類如此每聽訟必于法外行仁不妄入一罪不輕用一刑而人自不敢犯有沙四者充江寧驛馬戶爲直指所訪斷賊論罪矣顧四去而驛遞廢弛累鄉民二十四家朋黨四鎮賠擾無安枕期生訪知其故出四于獄諭之曰汝能改過復起此驛吾宥汝四感激期生捐金子之數日內得驛馬四十匹供應不匱請于直指盡釋其賊罪四亦感恩改行卒爲善人大京兆缺期生署篆遶正嘉以來先達

李公應楨沈公越等十人送入鄉賢以志景行後擢兵部
職方每夜私行詰訐究嚴局鑰以忤權貴乞休

江寧府志

陳祖苞字令威海寧人萬歷癸丑進士知崑山縣遇事果
斷不畏強禦賦役蠹弊力加釐剔定田之水旱荒熟以爲
徵糧緩急嚴丈量之法以正經界歷署太倉常熟邑民至

今頌德勿衰

崑山縣志

胡維嶽字又生臨安人萬歷戊午舉人授江西新昌令振
興文教團練義勇流賊寇袁州偵昌有備不敢窺歲飢捐
俸設法以賑頗多存活遷長史致政歸

臨安縣志

祝以真字佑徵海寧人萬歷戊午舉人知南豐縣裁冗役

抑豪強繕城簡甲備禦有方流寇不敢入境考滿歸

海寧縣志

應朝玉字碩甫仁和人萬歷己未進士授刑部主事歷員外郎福建恤刑時瑤篋方熾朝玉風骨嶙峋中時不屈出知河間府紳士爲魏忠賢立祠請太守書名于榜堅拒不

可幾罹于禍崇正初年錄用正士擢江西饒南道副使晉山西右布政士民保留改江西後遷河南左布政朝玉在江右擒劇盜興復水利以德政著聞及至河南捍禦流寇復以勞績著以疾終官署九江士庶思慕不置祀之名宦

乙亥崇祀鄉賢祠

應搗謙文集

按舊志有鮑奇謨傳邵本刪去之是矣後來刊刻時仍

載入循吏蓋不辨其生平也王崇簡青箱堂集撰奇謨墓志頗爲辨寃崇簡流寓餘杭主於奇謨之家未可爲定論据朱彝尊集有書先君子五言詩後一篇及明詩綜詩話雖籍貫舛誤而其人大槩可知矣今仍刪去

董一化字雲綱昌化人萬歷中由貢生司鐸吳庠篤于誘掖貧者分俸贖助尋陞建昌通判攝新城事視民猶子丁爲憂歸父老泣送數百里外立碑麻姑山以志去思

昌化縣志

沈復禮字叔真仁和人萬歷中由貢生投靈石令邑環境皆山田多旱患復禮爲做江南桔槔法激泉灌田民始無以曠乾饑者又地多桑民不知蠶爲致吳蠶種教以飼蠶

之術邑遂有絲續晉俗至今賴之會永寧州缺守撫軍陳志寰曰非沈靈石不可亟薦遷州其聲績如在靈石時以

平反隣邑囚中蜚語自免歸

仁和縣志

吳士科字選卿錢塘人萬厯中任遼東經遠衛經歷九載得邊氓心判山東濟南郡董遠陽芝蔴灣運甫兩月遼陽失仍運水陸米豆萬五千石貯灣未幾廣寧又失敗兵星散奉檄往來覺華諸島簡露積米豆三萬餘石渡救官生軍民男婦計三萬四百餘口馬騾二千頭又携寧遠銅鉛七萬斤鼓鑄充餉招撫流移集筆架山遊民尸祝事聞以道職用仍管山海總捕通判事務後授寧前兵備道以母

老乞歸

吳廷華文集

江思令字子九仁和人天啟辛酉舉人授黔陽令黔于楚爲邊邑皆苗民負險難治思令下車力爲振刷胥吏積爲假印支解錢穀立真之法豪猾斂跡暇則行縣申明孝弟之義俗爲一變張獻忠蹂躪全楚殆徧獨黔城得完又僞檄馳郡縣徵餉思令設法擒徵餉者殺之而取其已徵者數十萬緡還之旁邑其他廉惠之政尤多

毛先舒撰傳

鄭圭仁和人天啟三年知平樂縣蒞任七載撫字催科有方捐鹽羨以助糧餉積公餘以造浮橋庭無訐訟野無追呼陞去士民作逢年亭以寄思焉

廣西通志

郭正中字黎眉海寧人天啟甲子舉人授山西代州知州兼司理事治獄多平反期年決罰者僅二十六事尋與監司不合自劾歸後起爲兗東兵備副使單騎就道嚴清軍之法倣義倉之制撫流民練鄉勇勞來安集盜不敢犯史可法保舉監淮東諸路軍忤四鎮歸

朱一是撰傳

陳之伸字魯直天啟辛酉舉人授廣平令詳革津糧民賴以安調繁內黃驍賊李雲三犯之皆敗去晉上元令行取刑部主事時有直臣以誣就逮者尚書以下莫之敢爭之伸持其牘不上事漸解而同遠如陳子壯等亦釋恤刑山東時土寇新定愚民以左道牽染甚衆之伸分別矜疑縱

釋四千餘人匿遷湖廣叅議督餉上江大將不敢冒支一

錢以與物忤遂謝事歸

海寧縣志

曹履泰字方城海寧人天啟乙丑進士知同安縣時海賊鄭芝龍聚眾出沒海島中履泰嚴保甲練鄉勇喻以自衛法賊相戒勿敢犯已而芝龍就撫同黨之李魁奇挾鍾斌叛以執芝龍爲名履泰曰無憂也吾當使賊自屠之乃陰攜其黨不數日而魁奇成擒斌投水死海患永息

海寧縣志

柴世埏字蓮生仁和人天啟甲子舉人知崇安縣邑故衝疲民苦奔命世埏下車拊循一切與爲休息有貧民僕且病苦饑鬻妻它氏既定議子直其妻涕泣不肯行乃訟之

縣世埏訊得其狀爲捐俸金卒完其夫婦轉南京東城兵馬指揮使時方有楚警上江嚴兵偵邏有詭商與舟人爭舟人誣以爲盜株連數百人世埏察其枉力爭不得經年諸商多瘐死已而巡按左光先至世埏復爲解光先特疏陳情始得釋所全活甚衆三遷福建右叅政分守福寧數

年歸

仁和縣志

張大烈字言冲錢塘人天啟丁卯舉人爲瑞州推官清勁有聲讞獄多所平反署府篆山城民瘠鎮以安靜人皆愛戴之後以不善事權貴竟去官歸

錢塘縣志

趙元會字明卿於潛人天啟中由貢生知荔浦縣歷昆陽

知州仕至松江同知加銜僉事兩治荒陬率振廉能之譽

及貳松守凡華亭青浦皆藉攝理

於潛縣志

張師栻字世張仁和人與兄夢得同榜授桃源令蠲逋賦
決疑獄有能名擢袁州府丞夢得中天啟辛酉舉人崇禎
甲戌進士任教諭值流賊至居民男女數萬爭求入城守
者不許忠力請再四執鑰啟門納焉後授徽郡推官釐剔
奸弊一郡肅然辛巳歲飢捐資煮粥設廠賑給遷南儀制

郎致政歸卒年七十四

仁和縣志

高其昌臨安人天啟辛酉舉人知三水縣蒞事明敏讞決
精明百姓戴之秩滿陞延安同知致仕歸

臨安縣志

鄭尚友字士宏錢塘人崇正辛未進士授福建長樂令愛
民勤政縣有大豪犯罪力致之法建五賢祠勦崇正書院
以訓士六年考天下清官第一擢工部主事

長樂縣志

陸運昌字夢鶴錢塘人崇正甲戌進士授永豐令豐地墾
墾又新被兵逋賦以十萬計運昌將之任上書言永豐積
逋十萬今臣之官當疾徵之耶抑縱之耶縱之則無以佐
軍興按籍而誅慢令臣罪無赦疾徵之則民不堪命挺而
走險非誅臣無以謝黔首罪亦無赦臣旦夕死等耳何忍
因此一方民惟陛下幸哀憐之書奏帝下大農議遂蠲復
焉視豐未二載以治行最遷吉水令吉水田賦多乖紊邑

民周正淑請于朝願履畝丈之事下所司運昌召正淑科
畫形便審度利害并集文學弟子嗇夫司理雜議其所由
廢興之狀往覆辨難以十數民辭窮又爭言不丈便運昌
爲核民實無田有賦其賦浮于田者皆上其數取河壩棄
地非民業者代其賦不及田者寧失輕以加惠之具方畧
上奏制曰可民咸樂業楚饒處廣寇大起攻宜春去吉僅
百里運昌捐金築城樓櫓畢具賊亦不至以母憂歸
錢朝彥字殷求錢塘人崇正丁丑進士知句容縣蒞任數
月有飾金珠偽爲藥餌以獻者立置之法歲饑民晝掠于
市朝彥廉得其首惡斃杖下民乃戢被誣調簡旌德遂投

浙江
通志

劫歸

錢唐縣志

趙最字我唯餘杭人崇正癸未進士司理汀州能辨疑獄州民賴良翰擇穴欲葬其父近莊人周乃德室後法于居者不利夜半竊塋之周不勝憤掘之而得空穴遂以棄骸坐辟而賴氏之柩在最具知其詳故詰之曰良翰父柩自周一柩何反在賴處一訊卽服閩人神之至今尸祝

餘杭

縣志

姚生文字自牧仁和人崇正中由貢生任廣州市舶提舉嘗捐資修葺學宮及攝篆新會招撫流寇民獲以安遷廣州府同知以才能稱比去士民焚香酌酒餞送擢湖東道

卒

廣東通志

章聚奎臨安人崇正中由貢生任京山令革陋規培學校捐俸葺城保禦甚周時流寇連陷郢鄂隣邑悉破京山獨全何王二督撫檄赴軍中畫策論恢鄂功陞武昌府同知歷有惠政後致仕歸

臨安縣志

邵廷雋字彥伯錢塘人母傅早卒事繼母陳極孝及長游京師補江都少府地控淮海商賈聚焉羣盜竊發堯鹽鐵吏不能禁廷雋悉計擒之妾男子往來淮海間自稱周王孫掠民間婦女無算廷雋廉其偽檻送雒陽按驗果偽擢黃州別駕去之日揚民扶老幼拜送擁馬前不能去

舊錢塘縣

志

關鍵字六鈐錢塘人少與錢肅樂讀書勝果寺肅樂引繩
墨合規矩而鍵馳騁上下汪洋恣肆使讀者心悸兩人同
學相善鍵思爲有用之學以自見癸未成進士除知丹徒
縣縣有桃花洲村民所保聚也怨家指爲盜藪大吏將發
兵襲之鍵上謁曰京口彈丸地所恃以無恐者內亂不作
耳今信細人之言誅鋤善類是驅使亂也大吏乃止巨盜
鄧七潛結寨溲浦鍵遣吏招降鄧七僞約降期而陰欲渡
江遁鍵默戒吏卒馳至溲浦鼓行入其寨鄧七倉猝出迎
遂就縛其操縱合宜類此繼以母老乞養歸閉門著書不

交外事
吳農祥
就正編

杭州府志卷八十八終